

1001 MASALAH

ABU AL-MUKHTAR SEDIA MENJAWAB



Pertanyaan daripada:

A. Abdullah Thani,
Alamat Nai Chan Coffee Shop,
1 Ruamchit Road, Sadau,
South Thailand.

“Kenduri Arwah” lazim dibuat oleh orang-orang kita Melayu iaitu: Kenduri tiga hari tujuh hari, dua puluh lima hari, empat puluh hari dan seterusnya. Adakah ini berasal dari agama Islam atau sebaliknya? Diharap tuan memberi keterangan dengan beralasan al-Qur’an dan al-ḥadīth!

Jawab

“Kenduri arwah” itu memang sudah menjadi suatu kelaziman atau pun menjadi suatu adat yang biasa dilakukan oleh orang-orang Islam di rantau sebelah sini – iaitu negara-negara sebelah tenggara Asia ini – mengadakan “kenduri arwah” ini adalah menunjukkan suatu tanda “ingatan kasih mesra” yang tiada berkeputusan oleh keluarga si mati terhadap rohnyanya yang telah berpindah ke alam akhirat untuk menunaikan panggilan Ilahi.

Biasanya keluarga si mati akan merasa terkelindan dan tidak merasa berpuas hati jika “kenduri arwah” itu tidak mereka adakan selepas daripada matinya salah seorang daripada keluarga mereka yang paling hampir.

Meskipun di zaman Rasulullah dan para sahabat-sahabatnya tidak pernah dilakukan “majlis-majlis kenduri arwah” seperti yang biasa dilakukan oleh orang-orang kita, namun begitu ia tidaklah boleh dianggap suatu perbuatan yang salah kalau dipandang dari segi perasaan “kasih mesra” yang tak kunjung putus dari keluarga si mati terhadap mayat yang telah terlantar sebatang kara sejauh 6 kaki ke dasar bumi itu. Dan juga jika dipandang dari segi pergaulan di antara jiran tetangga yang datang menunjukkan rasa simpati mereka terhadap keluarga yang sedang dalam keadaan berdukacita itu, memang ada faedahnya untuk merapatkan hubungan jiwa di antara keluarga si mati dengan jiran tetangga yang datang ziarah itu.

Terutamanya dalam “majlis-majlis kenduri arwah” itu dipenuhi dengan bacaan-bacaan yang mengandungi *dhikr Allāh* yang diambil daripada al-Qur’an al-Karim, kemudian diiringi pula dengan doa-doa yang ditujukan khas kepada roh si mati dan seumum kaum muslimin dan muslimat, perbuatan inilah yang dinamakan oleh setengah para ulama “*Bid’ah Hasanah*”.

Cuma yang agak kita sangsikan sekarang ialah dari segi mengeluarkan perbelanjaan-perbelanjaan untuk menyediakan jamuan untuk dihidangkan kepada para hadirin yang datang mengunjungi “majlis kenduri arwah” itu. Kalau sekiranya orang yang mengadakannya itu termasuk golongan orang yang berada tidaklah menjadikan suatu keberatan kepadanya. Tetapi jika ia seorang yang sempit kehidupannya, ertinya dengan sebab hendak mengadakan “majlis kenduri arwah” itu ia terpaksa bergolok bergadai, dan selepas majlis kenduri itu selesai ia terpaksa menghadapi penderitaan hidup.

1001 Masalah

Perbuatan yang seumpama inilah yang dilarang oleh Islam, dengan sebab melakukan sesuatu perbuatan yang tidak disuruh itu – sekalipun baik tujuannya – sampai menyusahkan diri sendiri, adalah tidak sesuai dan tidak logik menurut pandangan Islam.

Kita perbandingkan sahajalah dua di antara rukun-rukun Islam yang diwajibkan oleh Islam ke atas penganut-penganutnya iaitu “zakat dan haji”. Mengeluarkan zakat itu adalah wajib tetapi dengan syarat orang-orang Islam yang diwajibkan mengeluarkan zakat itu ialah orang-orang yang berada atau boleh juga dikatakan orang yang berkemampuan, erti berkemampuan di sini ialah: Pendapatan yang diperolehi oleh seseorang itu melebihi segala keperluan yang dibelanjakannya setiap hari dengan secara sederhana, sehingga pada setiap bulan ia dapat menyimpan wang baki dari pendapatannya itu. Wang simpanan inilah apabila cukup nisab dan sampai haulnya diwajibkan ia mengeluarkan zakat.

Tetapi manakala kehidupan seseorang itu dalam keadaan susah sehingga ia hampir-hampir tak dapat menutupi sara hidupnya sekeluarga, maka Islam tidaklah mewajibkan ke atasnya mengeluarkan zakat itu, malahan ia diberi hak boleh menerima zakat kalau keadaan hidupnya sudah termasuk di dalam golongan yang dinamakan “fakir” atau pun “miskin”.

Begitu pula halnya dengan ibadah haji. Amalan haji adalah menjadi rukun Islam yang kelima, haji adalah merupakan suatu amalan yang diwajibkan oleh Allah ke atas setiap umat Islam dalam seumur hidupnya hanya sekali sahaja. Meskipun haji ini termasuk di dalam satu amalan yang wajib dilakukan oleh orang-orang

Islam, namun begitu ia mempunyai syarat-syarat yang tertentu. Di antara syarat-syaratnya yang terpenting sekali ialah kemampuan. Setiap orang Islam yang bercita-cita hendak menunaikan ibadah haji atau biasa disebut oleh orang-orang kita naik haji ke Makkah al-Mukarramah, maka ia haruslah lebih dahulu menilik keadaan dirinya. Sanggupkah ia mengadakan segala perbelanjaan semasa beberapa bulan di Tanah Suci itu, dan cukupkah wang untuk membayar tambang pergi dan pulang, yang lebih penting lagi sanggupkah ia meninggalkan perbelanjaan untuk sara hidup anak isteri dan kaum keluarga yang di bawah tanggungannya selama beberapa bulan itu? Sehingga apabila ia kembali semula ke tanah air kelak kehidupannya tidak akan menempuhi penderitaan dan kesusahan. Soal-soal inilah yang harus lebih dahulu diperhitungkan oleh setiap orang muslim sebelum ia memutuskan azam dan cita-citanya hendak menunaikan fardu haji itu.

Kerana Allah *Subhānahu wa Ta’ālā* tidak mahu memberatkan seseorang hamba-Nya di dalam menunaikan suatu perintah-Nya lebih daripada kadar kemampuan yang ada pada dirinya. Ini bersesuaian dengan firman-Nya di dalam *Sūrah al-Baqarah* ayat (286):

“Lā yukallifu Allāh nafsān illā wus‘ahā”

Ertinya: “Allah tidak memberatkan seseorang itu melainkan sekadar yang ter pikul olehnya (kemampuannya).

Di dalam ayat itu juga Allah mengajar kita orang-orang muslimin sepotong doa yang memohon supaya jangan dipikulkan sesuatu perintah yang tak mampu dikerjakan oleh seseorang hamba sebagaimana firman-Nya:

“Rabbanā wa lā tuḥammilnā mā lā ṭāqata lanā bih”.